

20/53.

DE VITALI,  
QUAE DICITUR,  
**PULMONUM CONTRACTILITATE, NERVIS  
VAGIS IRRITATIS.**



**DISSERTATIO INAUGURALIS**

QUAM  
CONSENSU ET AUCTORITATE  
GRATIOSI MEDICORUM ORDINIS  
IN  
UNIVERSITATE LITERARUM CÆSAREA DORPATENSI  
AD GRADUM  
DOCTORIS MEDICINÆ  
RITE ADIPISCENDUM

LOCO CONSUETO PALAM DEFENDET

AUCTOR

*Aemilius Knaut,*  
*Curonus.*



DORPATI LIVONORUM.

TYPIS HENRICI LAAKMANNI.

MDCCLIX.

# PARENTIBUS CARISSIMIS

Imp r i m a t u r  
haec dissertatio ea conditione, ut, simulac typis excusa fuerit, numerus exemplorum lege praescriptus collegio tradatur ad libros explorandos constituto.

Dorpati Liv., die 19. m. Jan. a. 1859.

(L. S.)  
(Nr 14.)

Dr. **Buchheim**,  
ord. med. h. t. Decanus.

HAS STUDIORUM PRIMITIAS

PI O G R A T O Q U E A N I M O

OFFERT

FILIUS.

DL1583

## PROOEMIUM.

Fibras musculares laeves in viis aërisferis, una pulmonum parte excepta, exstare, inter omnes, quorum his de rebus judicium sit, auctores satis constat. Pars, quam exceptam esse diximus, cellulæ sunt pulmonales. Mole schott<sup>1)</sup> quidem et Gerlach<sup>2)</sup> etiam in vesiculis fibras musculares adesse statuunt, quas tamen Koelliker<sup>3)</sup> et Leydig<sup>4)</sup> ibi exstare negant.

Quibus pulmonum fibris muscularibns aliquam necesse est propositam esse functionem, quae, quantum videtur, nulla esse potest alia, nisi contractio pulmonum. — Omnes physiologi etiam vitalem pulmonum contractilitatem statuunt, verumtamen usque ad hunc diem nondum contigit, ut aut pulmonum contractilitatem vitalem, quae dicitur, exstare, eamque a vi motoria paris decimi nervorum cerebralium dependere, certo demonstraretur, aut, hujus contractilitatis

1) Holländische Beiträge zu den anat. und physiol. Wissenschaften.  
1846. Vol. I. fasc. I.

2) Handbuch der allg. und spec. Gewebelehre des menschlichen Körpers, von Gerlach. 1848.

3) Koelliker, Handbuch der Gewebelehre, pag. 484 u. 85.

4) Histologie von Dr. Fr. Leydig, pag. 370.

magnitudo quanta ex ceterarum virium respirationi inseruentium comparatione esset, erueretur. Etenim observatores vel maxime versati in hac scrutationum provincia eos nacti sunt eventus, qui inter se prorsus repugnarent, alterique alteris locum non relinquerent. Quae perscrutationes quantae dignitatis non solum ad physiologiam, verum, quoniam quarundam pulmonis affectionum morbosarum sequelae ex hujus organi vi contractili mutata deduci possunt, ad pathologiam quoque essent, quum probe intelligerem, equidem in animum induxi, ut experirer, quantum mihi ad explicandam hanc quaestionem conferre contingeret.

Priusquam vero ad rei propositae expositionem accedam, laeto animo hac occasione oblata utor, praceptoribus meis summe venerandis, sub quorum auspiciis in hac litterarum universitate artis medicae studia colere mihi licuit, debitas gratias persolvendi. Imprimis tamen impellit me animus, ut prof. Dr. Kupffer, viro eruditissimo, grates agam quam plurimas, qui et dissertationis conscribendae materiam mihi proposuit et in experimentis instituendis tum consilio tum re strenuum mihi praestitit auxilium. Neque non scholae veterinariae proff. Dr. Unterberger et Dr. Brauell, viris doctissimis, gratiae sunt agendae, quod animalium, in quibus experimenta suscepi, nonnulla mihi suppeditarunt.

---

## PARS PRIMA.

### *Priorum observationes.*

Vitalis pulmonum contractilitatis, i.e. bronchiorum telaque pulmonum facultatis, qua fibris muscularibus contrahantur, disquisitio ex saeculo amplius repeti potest.

Prochaska, quod sciamus, omnium primus saeculi proximi superioris dimidio priore hanc vim contractilem pro certo posuit. Quod doleo, mihi non licuit, librum, in quo hac de re disseruit, adipisci, quippe qui neque in publica literarum universitatis, nec in caeteris, quas adiimus, bibliothecis inveniri potuerit. Idem hoc incommodum, quod ad opera ab Haller, Varnier, Trevirano et Wedemeyer conscripta attinet, nobis accidit, qui omnes auctores et ipsi hac de materia tractarunt. Quam ob causam fidem in litteris necessariam sequi atque ex fontibus secundariis ea, quibus opus erat, haurire debuimus. Nostra de quaestione autem Bergson<sup>5)</sup> in libro suo, quo experimenta et observations, quibus pulmonum contrahendi facultatem extare confirmaretur, diligenter omnia enumeravit, etiam illos attulit eventus, quos isti adepti sunt observatores, quorum opera ipsa nobis consulere non licuit. Affert vero haec pagina 76—78.

5) Bergson, Das krampfhafte Asthma der Erwachsenen. Nordhausen 1850.

Prochaska (Lehrsätze f. d. Phys. Ed. III. Vol. I. pag. 280) et Reisseisen pulmones animalis, quod vivum aperueris, multo magis collabi observaverunt, quam animalis mortui. In casu posteriore aëris expulsio sola vi elastica efficitur, in priore autem necesse est alteram quoque vim simul agere, quae quidem nulla alia esse potest, nisi fibrum muscularium, animali vivo, vis contractilis. Quod experimentum Bergson ait omnino consimile esse observationi illi, quam Parry aliique in animalium amisso sanguine pereuentum arteriis instituerint, ubi quidem vasorum lumen magis, quam post mortem, coarctatum contractumque invenirent. Pulmonibus se contrahendi facultatem tribuendam esse, etiam experimentorum irritando factorum eventus docent, in quibus periculis nunc bronchiorum dissectorum superficie, nunc eorum tunicis, nunc denique nervi vagi ramis applicata est irritatio.

Primum inter hos observatores locum Haller obtinet (Mém. sur la nature sensible et irritable des parties du corps animal. Lausanne 1756. T. I. pag. 53), qui, quamquam pulmonibus irritabilitatem derogat, tamen acidis concentratis in usum vocatis eos contrahi concedit.

Teste Varnier (Mém. de la sociét. roy. de méd. 1779, pag. 394) bronchioli non modo injectis fluidis vaporibusque irritantibus, sed etiam mechanica ad eorum superficiem irritatione exhibita contrahuntur.

Treviranus (Biologie Vol. IV. pag. 121), opii et belladonnae extracto adhibito, se effecisse refert, ut ranarum pulmones contraherentur.

Wedemeyer (Unters. über d. Kreislauf des Blutes. Hannover 1824, pag. 70), trachea quidem ramisque bron-

chiorum majoribus vel via mechanica vel ope apparatus galvanici irritatis, in canibus cuniculisque nullam animadvertere potuit contractionem, idem tamen, bronchiis, quorum diametros  $1/3 - 1''$  aequabat, modo eodem irritatis, lumen paullatim coarctari, quin etiam ex toto fere occludi observavit. At, ramulis etiam tenuissimis observatis, ei non contigit, ut ullum nanciseretur eventum certum.

Omnes hae observationes diversis scrutatoribus oblatae sine dubio coarguunt, vitalem pulmonum contractilitatem existare; attamen, quum illae sola inspectione nitantur, iis non modo exacto, ut experimentis fit, res ad liquidum perducitur.

Hanc rationem autem rem experimentis dilucidandi primus Krimmer<sup>6)</sup>, unus ex sui temporis scrutatoribus maxime exercitatis, iniit. Qui pulmonum vim contractilem tali modo demonstravit. Postquam, sterno ablato, cavum thoracicum aperuit, canis modo necati tracheam a larynge disjunxit, eique tubulum e gummi elastico factum immisit, quem campanae vitreae angustae aqua impletae subjicit. Quo facto, pulmonem columnae a Volta constructae effectui submisit, polo zinceo nervos vagos, cupreo inferiorem pulmonis partem contingens, quo ipso temporis momento per campanam vitream bulla aëris prodiit. Pariter omnium primus Krimmer bronchiorum fibras contrahi ratiōne exacta probavit. Namque, vervece modo mactato, ex tracheae ramo frustum excidit, eoque secundum longitudinem diviso, dimidium alterum tabulae vitreae imposuit, ejusque longitudinem notavit. Inde duobus finibus ope filorum metallicorum tenuium utrumque columnae a Volta inventae, ex paribus 16 compositae,

6) Dr. W. Krimmer, Untersuchungen über die nächste Ursache des Hustens. Leipzig 1819.

polum applicuit, qua in re, fibris longitudinalibus sese contrahentibus, frusti longitudinem fere linea deminui animadvertisit. Quo experimento iterato, eundem habuit eventum.

Simili, atque Kriener, ratione Ch. Williams<sup>7)</sup> acetate recentiore sua experimenta instituit. Cane enim modo occiso, tracheam cum manometro aqua impleto conjunxit, aper-toque thorace, quum pulmones propter vim elasticam exhibitam sese retraxissent, fluxum galvanicum ex transverso (a travers les poumons) per pulmones duxit. Extemplo fluidum, quod manometro inerat, sensim adscendere coepit, ac fere centimetris 5 altius adscendit. Simulatque autem fluxus galvanicus interruptus est, fluidum paullatim descendit. Hoc experimentum Williams compluries repetere potuit, ita tamen, ut discrimina minora minoraque existarent et, circiter 3 vel 4 sexagesimis elapsis, vis contractilis exhausta esse videretur.

Eodem, quo Williams, tempore Longet<sup>8)</sup> Parisiis sua experimenta fecit, qui tamen, methodo a Kriener inita non amplius usus, novam ingressus fuit agendi rationem, quae et difficillima et parum exacta est. Longet, experimentis in animalibus majoribus, uti bubus equisque, susceptis, fluxu galvanico nervi vagi ramos irritavit, qua re bronchios usque ad ramos satis exigui luminis contrahi observavit. Unde conclusit, fibras bronchiorum, saltem eas, quae in primis bronchiorum ramis reperiantur, natura musculosa, atque nervorum vagorum actioni subjectas esse.

7) Ch. Williams, Report of Experiments on the Physiology of the Lungs and Air Tubes (L'Leçons sur la Physiologie par H. Milne Edwards. Paris 1858, Tom. II, pag. 428) Report of the Tenth meeting of the Brit. Associat for the advancement of science. Glasgow 1840.

8) Longet, Physiologie du système nerveux. Paris 1842.

Hoc experimentum a Longet institutum, de quo modo mentionem fecimus, a Volkmann<sup>9)</sup>, viro clarissimo, repetitum est, neque tamen unquam successum habuit. Ceterum is methodum quandam protulit, qua et pulmonum vis contractilis et vis motoria decimi nervorum cerebralium paris ad illam efficiendam valens demonstratur.

Namque, animalibus decapitatis, tracheae tubulum, ad partem externam acuminatum et apertura satis tenui instructum, illigavit. Ante quam aperturam si lumen posuerat nervumque vagum tum ad apparatus galvanici vim exponebat, in quavis nervorum irritatione flamma repente commovebatur; quin etiam uno in experimento flamma omnino extincta est.

Fere eodem tempore Budd<sup>10)</sup> (medico-chirur. Transactions, Tom. XIII. 1841. pag. 36), ut hanc quaestionem ad liquidum exploraret, experimenta fecit. Qui tamen vim contractilem pulmonum negandam esse censem, quum pericula in cuniculis instituta, in quibus et pulmonum superficiem et bronchiorum persectorum ostia fluxus galvanici effectui exposuerit, nullum praebuerint eventum exoptatum.

Donders<sup>11)</sup>, qui, uti omnes physiologi, tonum pulmonum statuit, iisdem usus argumentis, quae supra diximus a Prochaska et Reisseisen prolata fuisse, hunc tonum etiam metiri conatus est. Qui, animali modo mactato, in trachea, ita ut aëri aditus non pateret, obturaculum perforatum, tubulo vitro praeditum, infixit, eoque ope gummi

9) Volkmann, Nervenphysiologie (Handwörterbuch der Physiologie von Dr. Rud. Wagner. Vol. II. pag. 587.)

10) Bergs. I. c.

11) Henle, Zeitschrift für rat. Medicin. Vol. III.

elastici cum manometro in conjunctionem adducto, nervum vagum et via mechanica et apparatu a Du-Bois Raymond excogitato irritavit, nulla tamen unquam motione in manometro aqua impleto in conspectum veniente. Qua in re inventit, tum solummodo motum fieri, si satis cautum non fuerit, ne irritatio galvanica quidquam praeter nervum ipsum afficiat. Musculi pectorales tantummodo paulum contrahebantur eoque aqua, quae manometro inerat, commovebatur. Ceterum Donders aliam quandam toni pulmonum metiendi rationem proposuit, qua tamen ipse ait se eventum certum adeptum non fuisse. Secundum rationem supra descriptam, animali vivo, manometrum hydrargyro repletum cum trachea in conjunctionem adduxit, ita ut aër nec intrare nec egredi posset. Inde, animali occiso, statim postquam respiratio cessavit, thoracem patefecit, qua re hydrargyrum, quod post animalis mortem in utroque manometri brachio pari fuerat altitudine, in tubulo adscendente millimetris 5 – 9 altius, quam in tubulo altero, adscendit. Tum, si quadrantem fere horae exspectavit, hydrargyrum quarta parte altitudinis, quam attigerat, inferius descendit. Inde ex eo tempore descensio hydrargyri multo tardius fiebat. Unde Donders conclusionem efficit, descensionem priorem celerius factam tono extineto, posteriorem tantummodo gasorum diffusioni continuo perduranti adscribendam esse, differentiam observatam tono attribuendam ratus. Attamen huic experimenti eventui parum momenti tribuit, hisce verbis usus: „Die Resultate der auf diese Weise angestellten Versuche waren ziemlich auseinanderweichend, weshalb ich keinen zu grossen Werth auf dieses  $\frac{1}{4}$  gelegt haben will.“

Denique restat, ut observationum tempore recentissimo a Wintrich<sup>12)</sup> factarum mentionem inferam. Cujus experientia in animalium, ut felium, canum, cuniculorum, ovium, suum, aut recens mactatorum aut periculi causa modo ratione apta necatorum pulmonibus sunt instituta. Viam a Donders initam secutus Wintrich tracheae brachium descendens manometri aqua impleti, aëris aditu praecluso, illigavit, nervumque vagum denudatum sejunctumque apparatu a Du-Bois Raymond invento irritavit. Verumtamen nunquam ei contigit, ut aquae in manometro aequilibrium ita turbatum observaret, ut illud ad musculos telae pulmonalis contractos referri posset.

Inde Wintrich, hac per vestigandi ratione omissa, eam ingressus est viam, ut pro nervo vago ipsam pulmonum substantiam irritaret, id quod etiam Ch. Williams fecerat. Thorace celeriter aperto, si thorax se retraxerat, extemplo manometrum aethere repletum tracheae immisit, quo modo quamquam electrodes, quantum per apparatus licuit, effectum quam fortissimum ad pulmonum talium superficiem exhibere potuerunt, tamen in manometro ne minima quidem fluidi motio animadvertisse potuit.

Qua re adductus, Wintrich paene dubitat, pulmonum contractionem fibris muscularibus laevibus effectam in adspectum cadere posse. Tum viam tertiam a Wedemeyer commendatam ingressus bronchiorum transversim dissectorum paries partesque proxime circumjectas irritavit. Thorace celeriter patescendo, diversas in pulmones incisiones transversas fecit, quibus, ut per se intelligitur, bronchios

12) Wintrich, Krankheiten der Respirationsorgane (Handbuch der speciel. Pathologie und Therapie von Virchow. Vol. V. part. I. fasc. I).

persegit. In hos inde ope apicum acuum tenuium fluxum electricum induxit, quo facto, manifestam eorum contractio- nem vidi. Jam, dubitationibus de vitali pulmonum tono sublatis, Wintrich eum ope manometri sub antlia pneumatica in animalibus etiamtum viventibus definire conatus est.

Quem in finem experimentum admodum difficile atque complicatum instituit, quod in ejus scripto „die Krankheiten der Respirationsorgane“ accuratius descriptum nos hoc loco breviter commemorare satis ducimus. Quae ad hoc ex-perimentum spectantia nobis maximi sunt momenti, ea paucis complecti liceat.

In animali vivo, postquam tracheae tubulum corneum illigavit, qui cum artificiali respirandi apparatu conjunctus erat, thoracem patefecit. Qui respirandi apparatus tali modo constructus erat, ut aër eo aspiratus tubulo peculiari e gummi elasticō facto in manometrum duceretur. Quodsi pulmo inspiratione artificiali expansus erat, is in exspirando vi mu-scularum fibrarumque elasticarum ad fluidum, quod manome-tro inerat, pressionem exhibuit, effecitque, ut columnae fluidi, aequilibitate omissa, jam differentiam 20—30 centi-metrum praeberent. Animali necato, si tota agendi ratio, ceteris paribus, repetitur, distantia duarum manometri colu-narum  $\frac{1}{2}$ — $\frac{1}{4}$  deminuitur. Quae pressus deminutio etiam cadavere refrigerato eadem manet. Hanc differentiam Win-trich e cessante tono vitali deducit, partesque, quas ille in pulmonum se centrabendi vi agat, in cuniculo  $\frac{1}{5}$ , quas fibrae pulmonum elasticæ sibi vindicent,  $\frac{4}{5}$  adaequare contendit.

## PARS SECUNDA.

### *Experimenta de pulmonum vi contractili, nervis vagis irritatis, a me instituta.*

Omnes, quae ex copia experimentorum non ita exigua manaverunt, observationes partim inter se pugnant partim tam parum exactae sunt, ut inde de vitalis pulmonum contractilitatis, quae vocatur, rationibus vix certas efficere liceat conclusiones. Quem finem ut assequeremur, nostra experimenta instituimus, in quibus id propositum habuimus, ut et vitalem pulmonum contractilitatem nervique vagi ad eam efficiendam vim, et ejus magnitudinem, quam fieri pos-set certissime, erueremus. Quod quum via directa in ho-mine fieri nequeat, in animalibus experimenta instituenda fuerunt, quibus seles canesque et cuniculos atque oves et equos adhibuimus.

Pericula nostra hunc in modum fecimus. Animalibus satis affixis, in media colli linea cutis incisionem longitudi-nalem, animalis magnitudini respondentem, fecimus, tracheaque in collo denudata, inter oesophagum tracheamque funicu-lum tenuem perduximus. Deinde nervos sympatheticum va-gumque aut simul aut separatim, id quod in singulis experi-mentis diserte commemorabitnr, sursum deorsumque, quantum fieri potuit, denudabamus atque disjungebamus, et sub iis fila serica, laqueis laxioribus factis, perducebamus. Quo facto, animalibus celeriter, et quidem aut exinanitione, arte-riis carotidibus dissectis, aut medullam oblongatam perse-

cando aut suffocatione aut ictu crano inferendo, quo illud destrueremus, mors inferebatur. Eodem temporis momento, quo animal ipsum ultimos ediderat respirandi motus, tracheam, incisione transversa, aperiebamns, parte membranacea posteriore tamen non sejuncta. Tum cannulam, quae hunc in finem antea ope tubuli e gummi elasticō facti cum brachio descendente manometri aqua impleti et millimetricis distincti in conjunctionem adducta fuerat, in tracheam introductam, ita ut aëris aditus p̄aecluderetur, funiculo, qui antea sub trachea perductus fuerat, fortiter constringendo fīgebamus. Cannulae finis tracheae illigandus, quo firmius insereretur, striis transversis instructus erat. Inde, cavo abdominali celeriter patefacto, hinc quam cautissime, pulmonibus non laesis, diaphragma pleuramque disjungebamus, in nonnullis experimentis etiam sternum auferentes. Jam cavum thoracicum patebat, quo facto, postquam pulmones vi sua elastica sese retraxerant, atque haec vis ex manometro cognita fuit, laquei nervis circumdati constringebantur nervique supra laqueos persecabantur.

Quod animalibus mortuis demum nervos vagos disseuiimus, eo consilio factum est, ut eorum irritabilitas quam diutissime servaretur.

Tum simul pulmonum superficiem nervosque vagos apparatus satis noto a Du-Bois Raymond excogitato irritabamus, atque, irritatione galvanica agente, vim pulmonum contractilitate vitali exhibitam directo ex manometro cognoscere poteramus.

Et pulmonum superficiem et nervos vagos uno tempore eo modo irritare potuimus, quod altero electrode nervos filis sericis protractos attigimus, altero fluxum galvanicum

in pulmones duximus. Hunc in finum inferior hujus electrodis finis furcae ad instar divisus erat, ut in singulos pulmones singula brachia vim exhiberent. Ne quis objiceret, pressum mechanicum, quem fines electrodis ad pulmonum superficiem exhiberent, eo valere, ut aér ex viis aëris egredieretur, ideoque fluidum in manometri brachio adscendente sursum efferretur, sicuti ejusmodi effectus, id quod postea in nostris experimentis nobis persuasimus, vel minima acus apice ad pulmonum superficiem pressione facta, observari potest, ea usi sumus cautela, ut hujus electrodis fines lamellula stannea instrueremus, has modo lamellas cum pulmonum superficie in contactum adducturi. Qua cautela adhibita, ut per se intelligitur, pressio mechanica fieri nequit.

Ut cognosceremus, quemnam effectum musculi thoracici in experimentis a nobis institutis omnino habere possent, singulis experimentis pericula, quibus id exploraretur, adjunximus, electrodium apparatus supra dicti alterum costarum superiorum, alterum inferiorum cartilaginibus applicando, eoque fluxum galvanicum per totum thoracem ducendo. Quibus periculis exploratoriis quid compertum sit, in singulis experimentis afferemus.

Reliquum est, ut de apparatu, quo pulmonum tonum mensi sumus, certiora quaedam afferamus. Quemadmodum jam supra diximus, cannulam, ita ut aëri aditus p̄aecluderetur, tracheae immissam tubulo e gummi elasticō parato cum manometri aqua repleti brachio descendente in conjunctionem adduximus. Quodsi fibrae musculares in pulmonum tela obviae contrahebantur, aér expulsus in manometrum perduciebatur, ubi necesse fuit eo columnarum fluidorum aequilibrium turbari. Distantia igitur, qua fluidi columnae

ex aequilibitate declinabantur, modus erat, ex quo pressionis vim metiri liceret.

Qua in re secundum leges physicas satis cognitas, ut eventus, quem adipiscamur, certus sit, magni refert, quae ratio diametro manometri cannulaeque et tubuli e gummi elasticō facti, quo illa inter se junguntur, diametris intercedat. Quae diametri prout diversae sunt magnitudinis, numeri manometro inventi, quibus vis pressionis denotatur, diversi sunt.

Huic incommodo vero ex diametrorum rationibus computando occurri potest. Quem in finem in omnibus experimentis, diametri respondentes quantae fuerint, afferemus. Tubuli e gummi elasticō confecti diametros in omnibus experimentis 6 mm. adaequabat. Manometris usi sumus duobus, quorum alterum 5 mm., alterum 6 mm. diametro fuit. Brevitatis gratia eorum prius *a* litera, alterum *b* litera designabimus.

Eo, quo exposuimus, modo experimenta, quae jam descripturus sum, instituimus. Ceterum admonendum est, experimenta haec non eodem, quo ea afferemus, ordine chronologico facta esse; sed potius alia quaedam pericula illis interposita fuisse, de quibus infra mentionem injiciemus.

Primo experimento ea, quibus vitalem pulmonum contractilitatem extare probetur, proponere liceat.

In quorum tribus primis irritationem galvanicam solummodo pulmonum superficie nervisque vagis simul applicuimus.

### EXPERIMENTUM I *in felē adulta factum.*

Animal, antequam experimentum fieret, quo facilis tractari posset, ictu cranio illato consopitum, inde exinanitione necatum est. N. vagus a sympathico non disjunctus; cannula tracheae illigata diametro 5 mm. aequavit, manometrum adhibitum est *b* lit. designatum. Vis pulmonum natura elastica exhibita fluidorum in manometro columnas ex aequilibrio in distantiam . . . . . 24 mm., vis pulmonum contractilitate exhibita in distantiam reredit. . . . . 30 mm.

In hoc experimento, cavo thoracico inde a cavo abdominali patefacto, etiam sternum abstulimus, musculosque pectorales, ut, eorum contractio quid ad experimentum nostrum valueret, comperiretur, irritavimus, neque tamen, quamvis manifesta muscularum thoracicorum contractio appareret, ullam aquae in manometro motionem observavimus.

### EXPERIMENTUM II *in felē magna factum.*

Hoc periculum modo eodem, quo superius, institutum est, nisi quod mors jam, dum nervi vagi et trachea denuantur, ob ictus cranio illatos ingruit.

Vis pulmonum natura elastica exhibita fluida in distantiam . . . . . 30 mm., Vis pulmonum contractilitate exhibita in distantiam reredit . . . . . 60 mm.

Muscularum pectoralium irritatio eundem, quem in periculo priori, eventum habuit.

### EXPERIMENTUM III *in mediae magnitudinis felē factum*<sup>1)</sup>.

Nervi vagi et sympathici in hoc quoque periculo inter

1) Brevitatis causa infra in experimentis aferendis distantiam, in

se disjuncti non sunt. Animal suffocatione necatum est, cannula conclusa. Sternum hoc quoque in casu ablatum fuerat. Cannula et manometrum eadem fuerunt, quibus ad experimenta superiora usi eramus.

Vis elastica . . . . . = 18 mm.  
Contractilitas . . . . . = 16 mm.

Experimentum exploratorium prioribus congruit.

#### EXPERIMENTUM IV in magno cuniculo mare factum.

In cuniculo nervos vagos sympathicosque separatim decurrere, satis constat, ita ut in hoc periculo, quid singularum nervorum irritatio valeret, observari posset. Laquei nervis circumdati coloris diversi erant, ita ut nervi cognomines laqueis ejusdem coloris insignirentur. Cavum pectorale solummodo inde a cavo abdominali apertum est. Animali exinanitione mors illata est. Cannula a nobis adhibita diametro 3 mm. adaequabat. Manometro usi sumus eo, quod a litera denotavimus.

Vis elastica . . . . . 20 mm.  
Contractilitas superficie pulmonum nervisque va-  
gis simul irritatis . . . . . 10 mm.

Inde nervos vagos solos per se, idque apparatus electrodibus ambobus, irritavimus, quo eodem temporis momento fluidum in manometro adscendere coepit atque 10 mm. altius elatum est.

Tum fluxum galvanicum nervis sympatheticis solis per

quam fluidi in manometro columnae, aequilibrio turbato, tum pulmonum vi elastica tum eorum vi contractili redactae fuerint, simpliciter numeris inventis designabimus. Simul ob causam eandem, quam diximus, vim pulmonum fibris contractilibus exhibitam simpliciter nomine contractilitatis denotabimus, aequa ac vis pulmonum fibris elasticis exercita nomine naturae elasticae appellari solet.

se applicuimus, qua in re tamen ne minima quidem fluidi in manometro motio in observationem venit.

Quae irritandi pericula, quoad irritabilitas durabat, quum alternis repeteremus, eosdem semper eventus nacti sumus.

Quemadmodum per se intelligitur, numeri in manometro inventi, irritabilitas quo magis diminuebatur, eo minores erant.

Experimento exploratorio iterum ac saepius repetito, id mirationem movit, quod aquae columna, quae in brachio manometri adscendente continebatur, in quovis irritandi periculo mm. 3—4 inferius descendit, qua in re thoracem magnopere dilatari vidimus. Hoc in casu etiam cavo thoracico patefacto aspiratio observata est.

Quum in experimentis instituendis id nostra interesset, ut, morte animali illata, irritabilitas nervorum quam posset minime diminuta esset, mors autem exinanitione allata, si cum aliis comparaveris mortis generibus sine majore sanguinis jactura certe celeriterque necantibus, uti medulla oblongata dissecata, nervorum irritabilitatem haud parum diminuat, consilium iniiimus, ut in experimentis infra describendis animalia dissecanda medulla oblongata morti daremus.

#### EXPERIMENTUM V in sele magna susceptum.

Periculum modo descriptum nobis haud dubio argumento fuerat, contractilitatem vitalem, voluminis pulmonum decrementa, a directo nervorum vagorum effectu pendere. Quod uti in hoc quoque experimento cognosceretur, dum animal vivit, sane non sine magna difficultate, nervos vagos a sympatheticis sejunximus, atque, unoquoque nervorum separatim denudato, pariter atque in experimento superiore, nervos cognomines ejusdem coloris filis sericis insigniimus.

Cavum pectorale hoc quoque in casu tantum inde a cavo abdominali aperiuimus. Cannulae diametros 9 mm. aequabat; manometrum adhibuimus *a* litera designatum.

Vis elastica . . . . . = 20 mm.

Contractilitas, pulmonum superficie et nn. vagis simul irritatis, . . . . . = 14 mm.

Contractilitas, pulmonum superficie et nn. sympatheticis simul irritatis, . . . . . = 6 mm.

Contractilitas, pulmonum superficie et nn. vagis sympatheticisque simul irritatis, . . . . . = 14 mm.

Contractilitas, nn. vagis solis irritatis . . . . . = 16 mm.

Contractilitas, nn. sympatheticis solis irritatis . . . . . = 0 mm.

Quum in hoc quoque periculo identidem musculos thoracis apparatu galvanico irritaremus, phaenomenon, quod jam supra commemoravimus, rursus exstitit. Thorax enim manifesto dilatatus aspirabat. Aqua in adscendente manometri brachio mm. 2—4 inferius descendebat.

#### **EXPERIMENTUM VI in cuniculo mediae magnitudinis susceptum.**

Hoc quoque in casu nn. vagi et sympathici separatis sejuncti denudati filis sericis respondentibus denotati sunt. Cannulae diametros 3 mm. fuit; usi sumus manometro *a*. Sternum non ablatum est.

Vis elastica . . . . . = 20 mm.

Contractilitas, superficie pulmonum et nn. vagis simul irritatis, . . . . . = 4 mm.

Contractilitas, nn. vagis solis irritatis, . . . . . = 4 mm.

Contractilitas, nn. sympatheticis solis irritatis . . . . . = 0 mm.

Famuli nos adjuvantis inscitia hoc experimentum pau-

lulum est retardatum. Nervi denudati sejunctique longius per tempus, quam in experimentis ceteris, antequam irritandi pericula fierent. aëris effectui expositi fuerant, qua re eorum irritabilitas minuta erat. Itaque nn. vagos ulteriore decursu sejunximus, locaque recens denudata irritavimus; quo facto, aqua in manometro mm. 6 altius elata est.

Periculum exploratorium eodem, quo in exp. priore, eventu fuit.

#### **EXPER. VII in cane menses 4 nato institutum.**

'Ex tribus, quae ultima descripsimus, periculis, nn. sympatheticorum irritationem nullam ne minimam quidem ad pulmonum contractilitatem vitalem vim exhibere, potiusque hanc solummodo a nervorum vigorum effectu dependere, quam evidentissime appareat. Qua causa adducti, consilium cepimus, in experimento hoc ceterisque postea in animalibus, in quibus nn. vagi et sympathici non separatim decurrunt, suscipiendis nn. utrosque, operatione tam subtili ac difficiili omissa, non inter se disjunctos simul irritandi. Sternum in hoc periculo rursus ablatum est. Cannula in usum vocata diametro 9 mm. fuit; manometrum adhibuimus *b* litera designatum.

Vis elastica . . . . . = 50 mm.

Contractilitas, superficie pulm. et nn. vagis simul irritatis . . . . . = 10 mm.

" " nn. vagis solis per se irritatis = 12 mm.

Thorace irritato, ne minimus quidem fluidi in manometro motus in conspectum venit.

Restat, ut afferam, hoc animali medulla oblongata dissecanda occiso, haemorrhagiam haud exiguum extitisse,

numerumque in hoc experimento de contractilitate inventum, comparatione cum vi elastica facta perparvum, fortasse ex sanguinis jactura, qua necesse erat irritabilitatem minui, repetendum esse.

**EXPER. VIII** *in fele magnitudinis mediae factum.*

Hoc periculum eodem, quo tertium, modo institutum est, nisi quod mortem medullam oblongatam dissecando intulimus :

Vis elastica . . . . .	= 26 mm.
Contractilitas, superficie pulm. et nn. vagis simul irritatis . . . . .	= 10 mm.
" " nn. vagis solis irritatis . . . . .	= 10 mm.
" " sola pulmonum superficie irritata	= 5 mm.

Musculorum thoracis irritatio eundem, quem in exp. 3, eventum habuit.

**EXPER. IX** *in fele parva factum.*

Cannula adhibita diametro mm. 5 erat; manometro *a* usi sumus. Cetera paria fuerunt, atque in experimento superiore.

Vis elastica . . . . .	= 28 mm.
Contractilitas, solis nn. vagis irritatis, . . . . .	= 10 mm.
" superficie pulm. et nn. vagis simul irritatis . . . . .	= 8 mm.

Nervorum irritabilitate, postquam illi in aëre refixerunt, tantopere deminuta, ut eorum ope apparatus galvanici irritatio in manometro tantum exigui momenti (circiter mm. 2—3) esset, nervos, uti in exp. VI diximus, decursu ulteriore sejunximus atque denudavimus, quo facto, quum loca ner-

vorum recens nudata irritaremus, aqua in manometro rursus mm. 4 altius adscendit. Musculis thoracis irritatis, phaenomenon idem, de quo jam supra mentionem injecimus, apparuit, thorace dilatato fluidoque in manometri brachio adscendente nonnullis mm. inferius descendente.

**EXPER. X** *in fele magna susceptum.*

Phaenomenorum, quae, thoracis musculis irritatis, apparebant quia summa erat constantia, quum, prout aut cavum pectorale a cavo abdominali tantum diaphragmate persecando apertum aut simul et sternum ablatum fuerat, semper in casu priore thorax dilataretur fluidumque in adscendente manometri brachio descenderet, in altero musculi pectorales contraherentur, fluido in manometro prorsus non moto, adducti sumus, ut haec pericula, quorum eventus etiam postea idem fuit, haud amplius commemoraremus. Cannula diametro fuit mm. 9; manometrum *a* in usum vocavimus; cetera pariter, atque in exp. IX, se habuerunt.

Vis elastica . . . . .	= 36 mm.
Contractilitas, superficie pulm. et nn. vagis simul irritatis . . . . .	= 18 mm.
" sola pulmonum superficie irritata	= 6 mm.

**EXPER. XI.** Periculo priore in fele paulo minore, ceterum modo eodem, iterato, hunc nacti sumus eventum.

Vis elastica . . . . .	= 32 mm.
Contractilitas, superficie pulm. et nn. vagis simul irritatis . . . . .	= 18 mm.
Contractilitas, solis nn. vagis irritatis . . . . .	= 15 mm.
Quum solius pulmonum superficie irritatio parum momenti faceret, eam deinde omisimus.	

**EXPER. XII in fele parva factum.**

Et in hoc et in duobus, quae statim describam, experimentis agendi ratio eadem, quae in exp. XI, fuit. Cannulae diametros 5 mm. aequavit; manometrum adhibuimus *a* litera denotatum.

Vis elastică . . . . . = 14 mm.

Contractilitas, superficie pulm. et nn. vagis simul  
irritatis . . . . . = 6 mm.

Contractilitas, solis nn. vagis irritatis . . . = 6 mm.

**EXPER. XIII in fele magna institutum.** Cannulae diametros mm. 9 fuit; manometro usi sumus *b* litera designato.

Vis elastică . . . . . = 20 mm.

Contractilitas, superficie pulm. et nn. vagis simul  
irritatis . . . . . = 40 mm.

Contractilitas, solis nn. vagis irritatis . . . = 36 mm.

**EXPER. XIV in mediae magnitudinis ove susceptum.**

Cannulae diametros mm. 12 fuit; manometro *b* usi sumus.

Vis elastică . . . . . = 44 mm.

Contractilitas, superficie pulm. et nn. vagis simul  
irritatis . . . . . = 8 mm.

Contractilitas, solis nn. vagis irritatis . . . = 12 mm.

**EXPER. XV.** In hoc periculo, cui cuniculum magnum adhibuimus, in quibus animalibus nervos vagos et sympathicos seorsus decurrere jam attulimus, rursus nervos utrosque singulos irritandi eorumque ad pulmonum vim contractilem effectum directo observandi potestas facta est. Quem in finem, ne permisceremus nervos, eorum cognomines coloris ejusdem filis insignivimus. Et in hoc et in experimento XVI. mortem non medullam oblongatam dissecando attulimus, quoniam, animalibus morti hoc modo datis, saepius

copiosum sanguinis profluvium ingruerat. Quod ut ob causam jam supra commemoratam evitaremus, animalia ictus ope mallei capitibus infligendo morte affecimus. — Experimenti instituendi modus idem, qui in tribus, quae postrema descriptimus, periculis, fuit. Cannulae diametros mm. 3 fuit, manometro *a* in usum vocato.

Vis elastică . . . . . = 24 mm.

Contractilitas, superficie pulm. et nn. vagis simul  
irritatis . . . . . = 12 mm.

Contractilitas, solis nn. vagis irritatis . . . = 12 mm.  
,, solis nn. sympatheticis irritatis . . . = 0 mm.

**EXPER. XVI in fele parva susceptum.** Cannula dia-  
metro 5 mm. fuit, manometro *a* adhibito.

Vis elastică . . . . . = 24 mm.

Contractilitas, superficie pulm. et nn. vagis simul  
irritatis . . . . . = 6 mm.

Contractilitas, solis nn. vagis irritatis . . . = 6 mm.

Quod tota experimentorum a nobis institutorum serie semper non nisi vim maximam, pulmonum contractilitate vitali exhibitam, quae observata fuerat, attulimus, eo defendere posse videmur, quod, hac ratione inita, necessitas eadem saepius repetendi vitatur, quoniam ita, quae his experimentis communia fuerunt, atque observationes in unoquoque periculo identidem oblatas brevi conspectu propo-  
nere licuit.

In quovis experimento, quos prima irritandi pericula praebuerant eventus, insignissimi fuerunt. Quibus periculis eo usque continuatis, quoad nullum jam in manometro mo-  
mentum fieret, haec momenta in unaquaque irritatione repetita

minora minoraque exstiterunt, donec, sexagesimis 10—12 circumactis, vis contractilis exhausta esse videretur. — Tum nulla jam neque solorum pulmonum nec nervorum vagorum per se neque anborum simul neque locorum nervi vagi recens denudatorum irritatio ullam contractionem provocavit.

E contrario in diversis experimentis, quum vis contractilis tantum exigua in manometro momenta faceret, idem observavimus, nn. vagis in decursu ulteriore denudatis locisque his recentibus irritatis, numeros rursus majores exsistere, at brevi post tamen denuo minui. Quod in eodem animali compluries experiri licuit.

Quod ad modum ac rationem attinet, qua in adscendente manometri brachio fluidum, pressione propter irritationem galvanicam pulmonibus exhibita, adscendebat atque deinde descendebat, admoneamus oportet, eam a modo illo plane discrepisse, quem iis in casibus observaverimus, in quibus aer ob pressionem mechanicam in pulmonum superficie condensatus, ut fluidum in manometro moveretur, efficeret. In casu posteriore enim fluidum et eximia cum celeritate adscendebat, et, quoad pressio durabat, in eodem loco subsistebat, ac, pressione sublata, eadem, qua sursum elatum fuerat, celeritate ad eum, quem prius obtinuerat, locum descendebat.

E contrario, irritatione galvanica ad pulmones agente, fluidum nonnullo demum post irritamenti applicationem tempore et quidem sensim ac paulatim adscendebat, summumque fastigium postquam attigerat, in eo per temporis momentum manebat, indeque, irritatione cessante, aequa, ut adscenderat, paulatim descendebat. Si autem, quum fluidi in manometro adscensio summum fastigium assecuta esset, tamen irritatio-

nis galvanicae effectus continuabatur, liquor nihilo minus, aliquot horae partibus ter millesimis sexcentesimis exactis, ad idem, quo ante irritationem fuerat, punctum referebatur. Quae phaenomena cum legibus, quae de fibrarum muscularium excitabilitate valent, omnino congruunt. Etenim E. d. Weber aetate recentiore admonuit, omnes musculos laeves vel voluntati non obedientes, si nervi respondentes irritarentur, aliquo demum post incitamentum applicatum tempore elapso, contrahi, eamque contractionem, uti tarde ac paulatim exsisteret, ita eodem modo evanescere, in musculis autem transversim striatis eo ipso, quo irritamentum ageret, temporis momento contractionem subito exsistere ac repente rursus cessare. In viis aeriferis vero fibras musculares laeves esse, satis convenit. In experimentis nostris fluidi in manometro ascensus descensusque, irritatione galvanica ad nervos vagos vim exhibente sensim factus, fibrarum muscularium laevium in viis aeriferis contractioni omnino respondet.

Quod ad alterum spectat phaenomenon, quo muscularum contractio etiam irritatione galvanica agente cessat, leges, quae de muscularum agendi facultate obtinent, ita sunt notae, ut copiosiore de iis expositione supersedere possimus.

Praeter experimentorum seriem a nobis propositam, qua vitalem pulmonum contractilitatem existare confirmatur, quemadmodum supra admonuimus, nobis altera est series periculorum prioribus interpositorum, in quibus eventus negativus fuit. Quam seriem omnino silentio praeteriri mihi non minus ali enum videtur, quam, si accuratius eam describere conaremur, a re proposita nimis abduceremur. Itaque,

quae in his experimentis maximi momenti fuerunt, hoc loco breviter complecti liceat. Hac in re autem discerni possunt

- a) *experimenta, quorum eventus cur parum sufficerit, explicatio nobis desit,*
- b) *experimenta, de guorum successu non sufficiente rationem reddere liceat.*

Ad *priora* quod spectat, ea septem numero in cuniculis, felibus, canibus, ovibus instituimus. Modus, quo haec pericula facta sunt, idem fuit, quo supra exposita fecimus. Neque non eadem et celeritate et dexteritate, qua experientia, quorum eventus vitalem pulmonum contractilitatem confirmavit, instituta fuerunt, ac nihilo secius tamen non praebuerunt nisi eventus negativos. Quae vero fuerit causa, cur eorum eventus non sufficerent, ne suspicari quidem audemus, quoniam ejusmodi conatus nihil prodesset, ac tantum rerum perturbationes adduceret, semper cum inscientia conjunctas, ex quibus nos amplius expedire nequiremus. Itaque solum jure contendere possumus, irritabilitatem nervi vagi in hisce casibus eodem momento, quo mors intraret, extinctam fuisse. Qui eventus negativi nobis nequaquam persuasiones ex periculis, quorum eventus pulmonum vim contractilem probarunt, petitas evellere possunt. Sunt potius argumento, iis in casibus, in quibus de quorundam nervorum functionibus quaeratur, easque alicujus irritamenti ad nervos respondentes applicatione examinare velimus, negativos horum irritandi periculorum eventus non satis valere ad functionem, de qua quaeritur, nervis derogandam, atque quam maxime cavendum esse, ne, his observationibus nixus, certam sententiam ponas.

Ad *altera* experimenta quod attinet, de quorum exitu

negativo rationem reddere queamus, in iis, sex numero, felibus canibusque et ovibus equisque adhibitis, ille, qui in altera experimentorum serie in usum vocatus fuerat, agendi modus non mutatus est. Causa, cur experimentum successu careret, una in fele ex pulmonum statu morboso repetenda erat; namque eorum lobi medius inferiorque, pneumonia affecti, statu erant hepatizationis rubrae.

In felis alterius trachea thrombus muci esformatus erat, qui, ut postea comperimus, ne aër transiret, impedimentum objecerat. In casu tertio, quo canem magnum adhibuera-  
mus, ut operationem faciliorem redderemus, drachma tinturae opii simplicis in venam jugularem injecta, animal antea consopitum fuerat. Inde, experimento suscepto, ne minimum quidem nacti sumus successum. Hoc in casu eventum negativum forsitan ex narcosi opio effecta repetendum esse censuerimus. Namque haec observatio ad eas, quae Dri. Bulatowicz<sup>13)</sup> in experimentis suis saepius oblatae sunt, prope accedit, quoniam et ille, si animalia, opio injecto, sopiverat, nervo vago irritato, ne minimam quidem reactionem observare potuit, dum, narcosi vel aethere vel chloroformylo effecta, res ita se non habuit. Ch. Williams<sup>14)</sup>, suis experimentis innixus, iis in animalibus, quae vel morphio vel belladonna consopita ac necata fuerint, muscularum pulmonalium vim contractilem evanescere testatur. Quae observatio tamen ut omni eximatur dubitatione, experimentis saepius repetitis opus esse, aperte confitemur.

13) Bulatowicz, *De partibus, quas nn. vagi in vomitu agant.*  
Disser. inaug. Dorpati 1858.

14) I. c.

In cane altero et in ove irritationis galvanicae usus post animalium mortem amplius horae quadrantem est retardatus; nam, apparatu, quo utebamur, corrupto, antequam reparatur, nervi vagi irritabilitas jam cessaverat.

Denique commemoremus oportet, equo adhibito, experimentum nullo successu fuisse, quia pulmones ubique tuberculis repleti essent, atque in altero casu, quum experimentum loci causa in schola veterinaria fieret, eventus adversi causam in eo fuisse repositam, quod, quum equus hora dimidia, antequam adveniremus, morte affectus esset, cadaver omnino refrixisset omnisque irritabilitas jam extincta esset.

## PARS TERTIA.

### *Conclusiones.*

Omnium primum admonendum est, ea, quae Donders<sup>15)</sup> et Winrich<sup>16)</sup> attulerint, fluxum galvanicum praeter pulmones nervosque vagos irritatos alias quoque partes, ut musculos thoracicos, afficere, et hos contractione sua, ut aër egredetur, efficere potuisse, ad experimenta nostra, quae successu non caruerint, neutiquam referenda esse. Sane in iis irritandi periculis a nobis susceptis, in quibus pulmonum superficies nervique vagi simul irritati sunt, hoc incommodum ingruere, eoque numeri inventi aut nimis magni aut, hoc effectu solo nixi, omnino falsi esse potuerunt. Verumtamen, quum ea, quae in iisdem animalibus et fluxu gal-

15) I. c.

16) I. c.

vanico a pulmonum basi ad nervi vagi partem cervicalem ducto et ambobus electrodibus ad nervos vagos sejunctos denudatosque applicatis, in quo casu posteriore illud objici non posse per se intelligitur, comperta sunt, plane inter se congruant (cf. exp. IV, VI, VIII, XII, XV et XVI), manifestum atque perspicuum est, iis quoque in periculis, in quibus tantummodo pulmonum superficies nervique vagi simul irritantur, effectum provocatum referendum non esse nisi ad pulmonum ipsorum contractionem. Quo si addideris, observationem in periculis exploratoriis nobis oblatam esse (cf. exp. I—X), muscularum thoracis contractionem in eo, quo illa experimenta fecerimus, modo nunquam pressu ad pulmones exhibito, ut fluidum in adscendente manometri brachio sursum efferretur, efficere potuisse, conclusiones ex iis deducendae experimentis, in quibus solummodo pulmonum superficiem nervosque vagos simul irritavimus, tantundem valent, quantum eorum experimentorum eventus, in quibus praeter hunc irritandi modum etiam nervorum vagorum per se irritationem suscepimus.

Ex tota periculorum, quibus pulmonum contractilitas vitalis probatur, serie haec sequuntur.

I. Pulmonum contractilitas vitalis, quae vocatur, i. e. voluminis pulmonum decrementum fibris muscularibus laevibus in pulmonum tela obviis effectum, exstat.

II. Haec contractilitas a decimi nervorum cerebralium paris effectu motorio dependet (cf. exp. IV, V, VI, XV).

Et contendamus oportet, nervi vagi fibras, quae pulmonum muscularis organicis praesint, jam in ejus parte cervicali adesse. Quod nisi ita se haberet, sed fibrae illae demum intra cavum thoracicum in nervi vagi decursum in-

trarent, in iis periculis, in quibus nervos vagos sola parte cervicali irritavimus, non potuissemus eosdem eventus nanesci, quos in illis, in quibus pulmonem totum nervosque vagos simul irritationi submisimus. Illo in casu tantum exigua fluxus galvanici pars istas fibras remotas assequi potuissest effectumque necesse foret multo minorem esse, quam quem toto pulmone irritato vidimus. Quos autem invenimus numeros, in utroque casu inter se congruunt, ita ut, quod diximus, has fibras nerveas jam in n. vagi parte cervicali positas esse, verum habendum sit.

Hoc loco non possumus quin hypothesis a Dr. Loewinsohn<sup>17)</sup> de nervi vagi ad fibras musculares in pulmonum tela obvias vi et effectu prolatam commemoremus. Qui, respirationem dissecatis nervis vagis mutatam explicare conatus, ope kymographii lineas curvas respirationem describentes delineavit. — Qua in re invenit, fine centrali nervi vagi intersecti irritato, lineam directam, sed infra abscissam positam, efformari. Unde respirationem, et quidem inspiratione durante, cessare conclusit. Hoc phaenomenon explanatur, hanc hypothesis ponit, ut in pulmonum tela fibras musculares laeves, quibus nn. vagi et sympathici praesint, inesse vagumque hic, aeque ut in corde, ad contractionem inhibendam valere ideoque, illo persecto, muscularum pulmonalium spasmum existere dicat. Hinc ait repetendam esse eximiam ceterorum muscularum respirationi inservientium contentionem, quae, fine centrali nervi vagi persecti irritato, medullae oblongatae irritatione sic effecta, ad spasmum usque adaugeatur. Quod vero linea directa, tunc ky-

17) Loewinsohn, Experimenta de nervi vagi in respirationem vi et effectu. Dissert. inaug. 1858. pag. 41 et seqq.

mographio delineata, non tantopere infra abscissam sita sit, quam in inspiratione profunda, id quod fieri necesse sit, quum musculi respiratorii magnopere intendantur, hanc ipsam spasmi fibrarum muscularium pulmonis sequelam esse existimat, quo inspirationi profundae obstaculum opponatur. Causam, cur exspiratio in hoc experimento tam insigni celeritate fiat, in eo quaerendam esse censem, quod pulmo, fibris ejus muscularibus spasio correptis, facile in statum pristinum redeat.

Haec vero inhibendi vis a Loewinsohn nervis vagis adscripta iis non est tribuenda. Namque experimentis nostris demonstratum est, fibrarum muscularium in pulmonum tela obviarum contractionem directe a nervo vago, atque, ut videtur, ab eo solo dependere.

III. Quod ad partes attinet, quas pulmonum fibrae musculares laeves ad vim contractilem in respirandi processu sibi vindicent, ab ipso initio confitendum est, fieri non posse, ut ejus mensura absoluta definiatur. Obstat enim impedimentum quoddam, quod, quantum nos scimus, nullo modo tolli potest. Hoc obstaculum enim perquam celeri nervorum excitabilitatis post mortis effectum deminutione affertur. Dum in aliis casibus (cf. exp. I, II, III, V et XIII) numeros obtinimus haud exignos vim contractilem indicantes, in aliis (cf. exp. VI, VII, XIV et XVI) hi numeri, experimentorum modo non mutato, tamen pro rata parte perparvi fuerunt. Quae res repeti non potest nisi aut ex deminuta repente excitabilitate aut fortasse etiam ex proplicitate quadam ad excitabilitatis deminutionem animalibus quibusdam propria.

Quae momenta ut tollantur, fieri non posse, nemo est,

qui non intelligat. Quod quum ita sit, contingere non potest, ut vitalis pulmonum contractilitatis mensura absoluta definiatur. Verumtamen numeros, quibus ea vis contractilis denotetur, a nobis inventos afferre liceat.

Computationem ex tuborum, quibus usi sumus, diametris, de qua jam memoravimus, tum quia admodum difficilis atque operosa est, tum, idque praecipue, quod absolutam toni pulmonum mensuram tamen constituere nequimus, omittendam esse credidimus. Ad definiendam vero rationem, quae inter vim toni pulmonum atque vim naturae elasticae intercedat, haec computatio vix quidquam utilitatis afferat, quoniam in pulmonum vi elastica definienda eadem sunt rerum conditiones, quae in eorum vi contractili constituenda obtinent. — Itaque definitio mensurae relativae harum virium justa est.

Haec ratio autem reperitur, si numerorum vim elasticam denotantium summam cum numerorum, quibus vis contractilis indicatur, summa comparaverimus. Haec summa 283, illa 420 aequat. Ergo apparet, rationem, quae inter vim elasticam et vim contractilem intercedat, talem esse 2:3, ita ut, si vim totam et natura elastica et contractilitate exhibitam, ut exemplo utamur, 15 adaequare statuerimus, ex hoc numero 9 ad vim elasticam, 6 ad contractilem referri oporteat.

Quem nos reperimus numerum, vitalem pulmonis contractilitatem designantem, is major est, quam quem Donders et Winrich invenerunt. Donders enim illam tertiam naturae elasticae partem, Winrich tantum quartam aequare contendunt.

Qua in re admoneamus oportet, numerum a nobis in-

ventum longe minorem justo fuisse, etiamsi in omnibus experimentis et nervorum irritabilitas et muscularum excitabilitas eadem mansisset, quia et sanguinis jactura et dolores cum periculis nostris conjuncta illas diminuerent necesse erat.

Utique tamen jure videmur affirmare posse, vim pulmonum fibris muscularibus laevibus exhibitam non esse tam exiguum, quam hucusque credita fuerit.

IV. Denique, quod ad contractilitatis vitalis in mecanismo respirationis vim et effectum spectat, alia non existat explicatio, nisi ut hanc vim simul cum vi elastica gravissimum in exspirando momentum activum esse, eamque obstaculum offerre dicamus, quod in inspirando aliis viribus superari necesse sit. Hoc ad normalem respirandi processum refertur.

Quod obstaculum pulmonum contractilitate oblatum quantum aut minui aut augeri queat, quatenus renis aductus inspirationem difficiliorem reddere vimque et celeritatem, qua exspiratio fiat, augere possit, et quatenus contraria rei ratio ad inspirationem faciliorem, exspirationem autem tardiorum atque debiliorem faciendam valeat, ad has quaestiones ut respondeat, pathologiae est propositum.

## **T H E S S.**

1. Asthma, quod dicitur, spasmodicum fibrarum muscularium in pulmonum tela bronchiisque obviarum status est spasticus.
  2. Circumcisio ceteris phimoseos operationibus est praferenda.
  3. Pulsus cordis foetus, duobus diversis abdominis locis et diversa frequentia in gravidis auditus, neutiquam signum certum gestationis gemellorum est.
  4. Curae successus non modo a medicamentis rite porrectis sed etiam a psychica medici auctoritate pendet.
  5. Irritationis galvanicae nervi, de cuius vi et natura quaeritur, eventus negativus argumento non est contra vim agendi nervo adscriptam.
  6. Homoeopathia ars est, non doctrina.
-